

**ZAKON
O PRIVREDNOJ KOMORI BRČKO DISTRIKTA BiH**

Na osnovu člana 23 Statuta Brčko Distrikta Bosne i Hercegovine ("Službeni glasnik Brčko Distrikta BiH" broj 1/00) Skupština Brčko Distrikta na vanrednoj sjednici održanoj 10. jula 2003. godine, usvaja

ZAKON O PRIVREDNOJ KOMORI BRČKO DISTRIKTA BiH

I. PREDMET ZAKONA

Član 1

Privredna komora Brčko Distrikta (u daljem tekstu: Komora) je nezavisno, nevladino, neprofitno udruženje pravnih i fizičkih lica koja obavljaju privredne djelatnosti u Brčko Distriktu Bosne i Hercegovine (u daljem tekstu: Distrikt).

Ovim zakonom uređuje se status, članstvo, osnivanje, registracija, aktivnosti, unutrašnje uređenje i finansiranje Komore, kao i druga pitanja od značaja za rad Komore.

II. OPĆE ODREDBE

Član 2

Naziv Komore je "Privredna komora Brčko Distrikta Bosne i Hercegovine". Samo institucija koja je osnovana u skladu sa ovim zakonom može koristiti ovo ime i biti registrovana pod istim.

Komora ima svojstvo pravnog lica s pravima i obavezama navedenim u ovom zakonu i drugim propisima donesenim u skladu sa ovim zakonom. Komora ima pravo da zaključuje ugovore, stiče i raspolaže pokretnom i nepokretnom imovinom, te da bude stranka u pravnim postupcima.

Komora stiče svojstvo pravnog lica registracijom u sudski registar u skladu sa ovim zakonom i Zakonom o registru preduzeća i preduzetnika Brčko Distrikta BiH. Sve radnje preduzete u ime Komore prije registracije stvaraju obaveze samo za ona lica koja su preduzela te radnje.

Član 3

Komora svoj rad organizuje u skladu sa ovim zakonom, statutom i drugim propisima Komore.

Komora može, u cilju obavljanja svojih djelatnosti, osnivati preduzeća, agencije, ustanove i druga pravna lica koja se registruju kod nadležnog suda u skladu sa zakonom.

Komora može povjeriti određene aktivnosti, iz svog djelokruga rada ili u vezi sa njim, drugim institucijama na osnovu zaključenog ugovora.

Član 4

Svaki profit ostvaren ekonomskim aktivnostima Komore ili aktivnostima pravnih lica iz člana 3 stavovi 2 i 3 ovog zakona, može se koristiti samo za unapređenje aktivnosti Komore koje su navedene u ovom zakonu i statutu.

Članovi Komore, članovi organa Komore, zaposleni ili donatori koji direktno ili indirektno učestvuju u aktivnostima Komore kojima Komora ostvaruje profit, ne mogu u tim aktivnostima ostvarivati profit ili drugu finansijsku korist.

Ograničenje navedeno u stavu 2 ovog člana ne isključuje naknadu za posao ili troškove u vezi sa realizacijom aktivnosti Komore kao što je utvrđeno ovim zakonom ili statutom.

III. ČLANSTVO

Član 5

Članstvo u Komori je na dobrovoljnoj osnovi.

Članovi Komore mogu biti sva preduzeća, banke, filijale, druga pravna lica i preduzetnici, koji se bave privrednom djelatnošću, a registrovana su u skladu sa zakonom i imaju sjedište ili obavljaju privrednu djelatnost na teritoriji Distrikta.

Naučnoistraživačke i obrazovne institucije, registrovana udruženja i fondacije i druge organizacije koje obavljaju privredne djelatnosti u Brčko Distriktu također mogu biti članovi Komore.

Član 6

Komora vodi registar svojih članova. Upravni odbor donosi propise o vođenju registra.

Članovi Komore mogu se organizovati u interesne grupe. Grupama može biti dat određen status i prava u skladu sa statutom.

IV. OSNIVANJE KOMORE

Član 7

Osnivačku skupštinu Komore saziva najmanje 60 pravnih ili fizičkih lica koja ispunjavaju uslove za članstvo u skladu s članom 5 ovog zakona i čije je sjedište na teritoriji Distrikta.

Na osnivačkoj skupštini usvaja se statut, koji je u skladu sa ovim zakonom. Statut Komore utvrđuje slijedeće:

- a) pečat Komore
- b) znak Komore, ukoliko ga ima,
- c) postupak izbora i odgovornosti organa Komore,
- d) postupak za prijem i isključivanje članova,
- e) prava i obaveze članova,
- f) osnovicu i način utvrđivanja članarine,
- g) postupak za izmjene i dopune statuta,
- h) postupak usvajanja drugih propisa i budžeta Komore,
- i) vrstu i način saradnje s Vladom Brčko Distrikta, sindikatom i drugim vladinim i nevladinim organizacijama,
- j) vrstu i način saradnje s drugim privrednim komorama u zemlji i inozemstvu,
- k) način informisanja javnosti o radu Komore,
- l) organizaciju i dužnosti stručnih službi,
- m) način osiguravanja transparentnosti svih aktivnosti Komore,
- n) uspostavljanje suda časti, ukoliko se formira, sastav, pravilnik o radu suda časti, kao sankcije koje ovaj sud izriče,
- o) uslove i postupak za raspuštanje Komore, naročito u pogledu preostalih sredstava i imovine Komore.

Na osnivačkoj skupštini se zatim biraju organi Komore u skladu sa statutom i ovim zakonom. Predsjednik Komore podnosi zahtjev za registraciju Osnovnom sudu. Zahtjev za registraciju uključuje slijedeće:

- a) spisak osnivača i njihovih adresa,
- b) spisak članova organa Komore,
- c) naziv, adresu i sjedište Komore,
- d) statut Komore,
- e) dokaz o vlasništvu ili drugim pravima na nepokretnostima.

V. AKTIVNOSTI KOMORE

Član 8

Komora u okviru svog djelovanja u Distriktu obavlja slijedeće aktivnosti:

- 1) zastupa interese svojih članova;
- 2) promoviše lojalnu konkurenciju, dobre poslovne običaje i poslovnu etiku;
- 3) zaključuje kolektivne ugovore sa Vladom Brčko Distrikta i sindikatom, u skladu sa Zakonom o radu i drugim važećim propisima,
- 4) saraduje sa i daje savjete javnim institucijama i vlastima Distrikta u domenu privrednog zakonodavstva i privredne politike;
- 5) saraduje s drugim privrednim komorama u BiH i inozemstvu;
- 6) vodi i promoviše edukativne programe i obuke;
- 7) promoviše jedinstveni ekonomski prostor u BiH;
- 8) stvara povoljne uslove za strane investicije;
- 9) prikuplja i obrađuje podatke i vrši analize tržišta u domenu ekonomije;
- 10) informiše javnost o podacima u vezi sa ekonomskim trendovima u Brčko Distriktu;
- 11) pruža usluge preduzećima, drugim pravnim licima, preduzetnicima i institucijama;
- 12) organizuje sajmove i druge aktivnosti u cilju promovisanja roba i usluga članova Komore;
- 13) promoviše unapređenje tehničkih i drugih standarda;
- 14) promoviše aktivnosti istraživanja, razvojne projekte i inovacije;
- 15) promoviše tržišne institucije i upotrebu moderne tehnologije.

Zakonom ili odlukom izvršnih organa vlasti donesenim u skladu sa zakonom, Komori se može povjeriti vršenje javnih ovlaštenja u okviru aktivnosti Komore. U smislu ovog zakona, javna ovlaštenja su sve javne administrativne funkcije koje vrši Vlada Distrikta u skladu sa Statutom Distrikta i Zakonom o izvršnoj vlasti Brčko Distrikta.

Ukoliko Komora prihvati vršenje javnih ovlaštenja, vršit će ih na zakonom propisani način.

VI. ORGANI KOMORE

Član 9

Komora će imati slijedeće organe:

- a) skupštinu,
- b) upravni odbor,
- c) predsjednika,
- d) nadzorni odbor.

Mandat organa Komore traje dvije godine. Izbori za organe Komore su javni.

Član 10

Postupak izbora, obim odgovornosti, unutrašnje funkcionisanje i druga pitanja u vezi s radom organa Komore reguliše ovaj zakon, statut i drugi propisi doneseni u skladu sa ovim zakonom i statutom.

Član 11

Privredna komora može uspostaviti sud časti. Sud donosi odluke vezane za kršenje dobrih poslovnih običaja, statuta Komore i drugih propisa Komore ukoliko su sve stranke u postupku ujedno i članovi Komore.

Sud iz stava 1 ovog člana ne može donositi odluke koje će imati snagu pravosnažnih sudskih presuda.

VI. 1. Skupština Komore

Član 12

Skupština je najviši organ Komore.

Skupština ima najmanje 37 članova i sastoji se od predstavnika izabranih od svih članova Komore. Svaki član ima jedan glas.

Član 13

U okviru svojih ovlaštenja, Skupština:

- 1.1. mijenja statut,
- 1.2. usvaja budžet i godišnji finansijski izvještaj,

- 1.3. usvaja godišnje izvještaje upravnog odbora i nadzornog odbora,
- 1.4. utvrđuje iznos članarine za članove Komore,
- 1.5. bira i razrješava članove drugih organa Komore u skladu sa ovim zakonom i statutom,
- 1.6. usvaja propise, odluke i preporuke u skladu sa ovim zakonom i statutom,
- 1.7. raspušta Komoru.

Sva druga pitanja vezana za organizaciju, rad i odgovornosti Skupštine regulisana su statutom i pravilnikom o njenom radu.

VI. 2. Upravni odbor

Član 14

Upravni odbor ima deset članova. Članove bira Skupština prostom većinom prisutnih članova. Kvorum za izbor upravnog odbora čini tri petine svih upisanih članova.

Član 15

U okviru svojih ovlaštenja, upravni odbor:

- 2.1. sprovodi odluke koje je donijela Skupština,
- 2.2. predlaže Skupštini propise i odluke za usvajanje,
- 2.3. donosi propise Komore ukoliko ga Skupština za to ovlasti,
- 2.4. predlaže budžet Skupštini,
- 2.5. podnosi Skupštini godišnji finansijski izvještaj i izvještaje o svom radu,
- 2.6. imenuje generalnog sekretara,
- 2.7. naplaćuje članarinu,
- 2.8. izvršava ostale dužnosti u skladu sa ovim zakonom, statutom i svim drugim propisima Komore.

Sva druga pitanja u vezi sa organizacijom i odgovornostima upravnog odbora reguliše statut i pravilnik o njegovom radu.

Član 16

Upravni odbor imenuje generalnog sekretara koji organizuje svakodnevne aktivnosti Komore i rukovodi poslovima ekspertnih službi Komore.

Sva pitanja u vezi sa imenovanjem, radom i odgovornostima generalnog sekretara reguliše statut i drugi propisi Komore.

VI. 3. Predsjednik Komore

Član 17

Skupština iz reda svojih članova bira jednog predsjednika i dva potpredsjednika, prostom većinom. Kvorum za izbor predsjednika i dva potpredsjednika Komore čini prosta većina svih upisanih članova Komore.

Predsjednik i dva potpredsjednika moraju svoje dužnosti vršiti u skladu sa ovim zakonom, statutom, drugim propisima Komore i odlukama koje donese upravni odbor.

Sva druga pitanja u vezi sa radom i odgovornostima predsjednika i dva potpredsjednika regulišu statut i drugi propisi Komore.

VI. 4. Nadzorni odbor

Član 18

Nadzorni odbor sastoji se od predsjedavajućeg i još dva člana. Sve članove nadzornog odbora bira Skupština tročetinskom većinom glasova prisutnih članova. Kvorum za izbor nadzornog odbora čini tri petine svih članova Komore. Članovi nadzornog odbora imaju priznat integritet i stručnjaci su u oblasti ekonomije ili prava.

Nadzorni odbor nadgleda rad upravnog odbora, predsjednika Komore i generalnog sekretara i Skupštini podnosi godišnji izvještaj o njihovom radu. Nadzorni odbor također je odgovoran za nadgledanje izvršenja budžeta.

Sva druga pitanja u vezi sa organizacijom i odgovornostima nadzornog odbora regulišu statut i pravilnik o njegovom radu.

VII. FINANSIRANJE KOMORE

Član 19

Komora se finansira od članarina, prihoda od usluga koje Komora pruža svojim članovima i trećim licima i iz drugih izvora, u skladu sa ovim zakonom, statutom Komore, drugim propisima Komore i svim relevantnim zakonima i propisima.

Cijene usluga koje Komora pruža utvrđuje upravni odbor. Cijene za usluge koje Komora pruža svojim članovima mogu biti niže od cijena za usluge koje Komora pruža trećim licima.

Lista cijena iz prethodnog stava ovog člana se objavljuje u "Službenom glasniku Brčko Distrikta".

Član 20

Upravni odbor svake godine podnosi skupštini Komore prijedlog budžeta prihoda i rashoda, kao i izvještaj i godišnji finansijski izvještaj za prethodnu godinu uz sva potrebna objašnjenja i relevantnu dokumentaciju.

Godišnji izvještaj i godišnji finansijski izvještaj za prethodnu godinu arhiviraju se u ekspertnim službama Komore i dostupni su svim članovima Komore i nadležnim organima Distrikta.

O prijedlogu budžeta javno se raspravlja i glasa na Skupštini.

VIII. PRIJELAZNE I ZAVRŠNE ODREDBE

Član 21

Statut Komore i sve njegove izmjene i dopune objavljuju se u "Službenom glasniku Brčko Distrikta BiH".

Svi zakoni i propisi koji su na snazi na teritoriji Distrikta, a koji regulišu osnivanje, rad i nadležnosti privrednih komora, prestaju da se primjenjuju danom stupanja na snagu ovog zakona.

Član 22

Ovaj zakon stupa na snagu 8. (osmog) dana od dana objavljivanja u "Službenom glasniku Brčko Distrikta".

**Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА**

**Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA**

Broj: 0-02-022-214/03
Brčko, 10. juli 2003. godine

**PREDSJEDNIK
SKUPŠTINE BRČKO DISTRIKTA
Mirsad Đapo, dipl. pravnik**

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.